

Pablopa Titodsa ima teppe dosse inajaro

Tito

Tahidepa Tito, Pablo tedseje dsama onihi, onihihuaji huedaridsajari, Dio Atti maride. Nadsapa dsama Cretahuaji bacco toquinadsapa Pablo Tito inebojari, nahi Cretacca madija Jesodsa jehe quinajarideni maride tojahijine. Cretapi passo nocconidsa dsama huittidsacossajaro onini. Najaro passo imeni oninipi Mediterráneo.

Tito Cretadsa madidsapa Pablo pocca ima teppe pohuadsa dosse inajaro. Jesodsa toquejenajarideni nejecoma quinahijinecca ima dsodo inajaro. Pohuadeni maridedeni nejecoma quinahijinecca ima dsodo, poccadeni mamari tabaqqi ecahuabaqqi-manahijine nejecoma quinahijinecca ima naqui dsodo inajaro.

Pablo nija najari

1 ¹¿Nija Tito? Ohuapi Pablo. Ohuapi Diocca medse ojani. Bedi Jesocristocca dodosse oajaro. Jesocristopa ohua cadossejaria aji pohua tahimari ohuacomeraridsadsapi pohuadsa jehe quinahijine. Diopa tahide nahato tapojaria aja madija icattejidsa-baqquijaripaja. Najarideni Dio pocca pajissehe tocahatterahijine pohuadeni mari ocanabaqqihijine ohua cadossejari. Jehe, Diocca pajissehepi Dio Pohuadsa imadinissa tanijine ia mari tocanabaqqijaro. ²Pocca pajissehe icahatteradsapi camittehe jiquejeranicca icajinijine tohuini imadijaro. Diopa maidsera tahi. Najaro ima tojanijinepi maittaccadsama Dio huati tapojari. ³Jehe, najaro ima dsati bicanipi jidapana

Dio inanajorapojarocca huada bacco tadsa iadsa ahuato inanjaro-paji. Najaro Pohua tahimari mari ocanabaqqihijine ia Tonassijade Dio ohua dosse naridsajaripaja. –Ohuatti tecomeraridsaji –najari-paja ohuadsa. ⁴Tito, tiadsa occa ima dsodo onajaro. Aji ohua tia tedseje: –Pajissa Jesocristopa ia Tonassijade –inadsapi tiapi pina occa ejedenissa tajaro. Icca Abi Dio, ia Tonassijade Jesocristo tedseje tiadsa ima bicani inanamanana. Tibodidsa naqui poccadeni jonehe tojana, onajaro.

Titopa Cretahuaji Jesodsa jehe quinajarideni ecahuaridsabaqqijari

⁵Jehe Tito, aji passo nocconidsa dsama huittidsacossajaro oninipi Creta, iapi nanidsa Dio

Atti tojaridsanijine idsepe iji-jarode. Najaro ima jiquejeraraha ohuapi occajarode. Nani Cretadsa tia onebojaropi tiana najaro ima tinajicanijine, aja *Jesodsa jehe quinajarideni cacahuadedeni ticattejidsabaquihijine tia mari ocanajarode. Cretahuajicca odsa onihi onihi naridsajarocca aja Jesocristodsa quequeriqui-ridsamana nahihuajicca cacahuade toquejenahijine ticattejidsaridsajo, onajarode. ⁶Nadsama Jesodsa jehe quinajarideni cacahuade tojahijinepa bica tajarira ticattejidsajo. Nahi madija ohuaha attideni pohuadsa: –Pocca ima tabaccora tani –quina-jarahijine. Amoneje ojarini cajjarina ticattejidsajo. Aja madija pohua bedideni Jesodsa jehe quinajarira ticattejidsajo. Madija ohuahadeni pohua bedidenidsa: –Pohuama madimanajari, iboquiri nahi –quina-jarahijine. Aja madija bedideni madimanahissa tajarira ticattejidsajo. ⁷Nadsama Jesodsa jehe quinajarideni cacahuade tojahijinepa madihissa tajarina ticattejidsajo. Nahi Diocca imadsa dsepe ijihissa tahijine. Aja madija pohua deni totonana najaripa pohua. Huadi tajari naco pohua. Dsedse coma tanicca tohuini najari naco pohua. Pohua tessacca najidso tajari naco pohua. Maidsehedsa dsiniro cacaji najari naco pohua. Todsepe-tajitohui mamajidsa najari naco pohua. ⁸Nadsama aja Jesodsa jehe quinajarideni cacahuade ticattejidsajaripa madija ohuaha pocca odsadsa bacco najonadsapa: –¿Nija, bica tinaqui? ¿Tipemiqui? –nahina bica tahi. Pohuapa ima bica tanicadsa huahuatidse nadsana bica tajari.

Pohua bodi huatomahissa tadsa ima bicanira tocattejidsade nahato tajarina bica tajari. Pohuapa imari borocco, Diodsa huati huana, Diodsa dissera, imasiri inana-jeranijine pohua cacahuahissa tajarina bica tajari. Madija nama najarina Jesodsa jehe quinajarideni cacahuade tojahijine ticattejidsajo, onajarode. ⁹Nadsama Jesodsa jehe quinajarideni cacahuade tojahijinepa aja Jeso tahimari pajissacca pohua mari icanamanapojaridsa dissera tajarina bica tahi. Nahi pohuajine pocca marinaja Dio Atti pajiranissa tadsapi pocca mamari tabaquicca jeheniji todacorani nanijine. Nahi pocca marinaja ettajomanajarodeni naco pocca marinajadsa: –Jehe, pajissa –quinahijine.

¹⁰Jehe Tito, Jeso tahimari pajissacca maride dissera tahijine tohui onajaropi nahi tiadsa quequeriqui najarideni motapa Jeso tahimaridsa tohuibomanahi huapi tahi. Pohuadenipa ima ponimaccara huati huati totoquina nadsapa madija ihicamajidsa-baquimana najari. Najaridenipa *jodiodeni mota Jesodsa jehe quinaraha poccadeni marinaja aja *huissinaja cajimanahijinecca nebomana-jarajari. ¹¹Najaridenipa denima mari quina-jarahijine joma tinanabaquijio. Ajana, poccadeni marinajajinepi madija ohuaha ohuaha poccadeni odsacca madijama ssamoni ahuamanahi. Poccadeni marinaja tabaccora taraha najarodsa dsiniro cacajimana najari. ¹²Ajana, maittaccadsamacca ima pohuadeni tahimarissa najaro Cretadenicca madija ojarira ima nahatojide rabote huati tapojaripa: –Occa madija

Cretadenipa maidsajidede rahi. Pohuadeni tessecca naco huadiqquri nahi. Pina bani huadi tajari-ssa quinahi. Tarabaidseraqquri naraha jipajidede rahi – nahi nade. ¹³Jehe Tito, pohua attipa pajissa. Nadsapi ticca madijadsa tetti dacorehema huati ticanabaqqujo: –Paji, marinaja maidsehecca maridedeni caji tahi. Tiadeni tocamaidsabaqquihijine tohuini quinajari. Jeso tahimari pajissaccdsara jehe tiquinaji –tana, onajaro. Daco tijiraji. Tetti mittamanadsapa poccadeni jeheniji todacorapomanijine. ¹⁴Nadsapa jodiodenicca ima ponimacca nebomanahijine. Jeso tahimari pajissacca ettajomanajaro attideni naco nebomanahijine. ¹⁵Ajjaro imapi nahatoqquri inani. Najaria aja madija Djojine bodideni huireqquri najaridenidsapa huapima oppinera tahi. Pina jipamanahicca, pina dama quinahicca, pina qqui toquinahicca huapima bodideni huireqquri najaridenidsapa bica tahi. Naraha aja Jesodsa jehe quina-jarajaridenipa bodideni tabaccoraqquri nadsapa pohuadenidsa bica tahicca nohuerahi. Huapima pohuadenidsa oppina tahi. Pohuadeni bodicca tabaccorehejine ima bicanira icattejidsamananijine ssamoqquri najari. Bodideni ima bicanitohui huahuatoma-mananajarajari. ¹⁶Pohuadeni attipa: –Diodsa jehe inani –quiquinana-raha poccadeni madiedsa pohuadenijine ima ahuato tani: Diodsa jehe quina-jarahi. Pohuadenipa Diodsa tohuajari nadsiqqquri nahi. Dio Pohua Attidsa naco iboqquri nahi. Pohuadenipa ima bicani inamananijine ssamoqquri najari.

Dio Attira mari icanabaqquihijine

2 ¹Naraha Tito, tiana madija mari ticanabaqquidsapa Diodsa marinaja pajiranissa taniccama pohuadeni mari ticanabaqqujo. ²Jadahideni ajama quinahijine mari ticanabaqqujo. Mohuara-dsa madimanana. Nahi madija ohuahadeni madierideni qqui toquinadsapa: –Jehe, poccadeni ima bica tani –quinahijine. Bodideni huatoma-manahissa tadsa ima bicanira tocattejidsade nahatoqquri nahijine. Pina aji Diocca imassa najarora icattejidsamananijine. Jadahidenipa Jesodsa jehe quinahissa tahijine. Diocca tohuati huanehema huapimadsa huatideni huanaqquri nahijine. Ima ocassera tanicca naqui mohuaradsa inahamanadsanaponijine.

³Najarossa najaro amoneje jadadeni naqui mari ticanabaqquji. Dio noppine cappinamanadsa madimananissa tanijine. Madija pohuama inatabaccoramanahijine ima ponima huati huati nanaridsamana nejeranijine. Dsedse coma tanicca naqui tohuini quina-jeranjine. Ponidenicca madiedsa ima bicani ahuato inamananijinena bica tajaro. ⁴Jehe, amoneje imani joconi toquejenapojaropi ajjaro imadsa dsotodenedicca mari icanabaqquimananijine bica tani. Ponidenicca maqquidsapa, ponidenicca ejedenidsa naqui huatinideni huanaqquri nadsa inamadibaqquimanahissa tahijine. ⁵Bodinideni huatoma-mananissa tadsa ima bicani tocattejidsade tocahatteranijine. Maqquideje ohuaha tohui

quina-jeranijine. Ima bica tejeraniccatohui bodinideni huahuatomanana nejeranijine. Ponidenicca odsa bica tanijine cacahuadera tocahatteranijine. Ponideni attinideni bica tadsa ponideni tassani acco acco ihicamaridsa-baqquimanananijine. Ponidenicca maqqui attidenidsa naqui iboraquiqui nanijine. Jehe, najaro ima tocahatteradsapi madija ohuaha ponidenicca madie qqui toquinadsa: –Dio Attipi tabaccora tani –quinahijine ssamo tani.

⁶Jehe Tito, najarossa najaro dsabissodeni naco bodideni huatoma-manahissa tahijine mariticanabaquijo, aji ima bicanira tocattejidsade tocahatterahijine. ⁷Tito, tia naqui timadinissa taji, ticca madie pohuadenidsa ahuatotanijine. Nahi dsabissodeni ticca madie qqui toquinadsa: –Ia naqui nema inana –quinahijine. Mari ticanabaquidsa naco maidsehe jirehe, jidsehe jirehe, pajissara Dio Atti ponira mariticanabaquijo. ⁸Ticca marinaja bica tadsa tinapajiranissa taji. Nahi ticca marinajadsa: –Bica tejerani, pajiranissa tejerani –quina-jarahijine. Nadsapa madija ticca marinajadsa jiperaquiqui najarideni tiadsa ima inanamananijineraha pohuadenipa cappinamanahitohui. Tetti pajiranissa tadsapi iadsa ima inanamananijine ssamomotahitohui.

⁹Nadsama aja *madijacca dodosse mamadimaneri najarideni naco ajama quinana: Pohuadeni dossede attidenidsa iboraquiqui nahijine. Huatidsehema dsepedeni ihijimana nahijine. Pohuadeni dossede attidsa naco tossonidsimamana-jarahijine.

¹⁰Botimana-jarana. Maidsamanajaradsa pohuadeni dossede atti inapajiramananissa tana. Nahi poccadeni madie qqui toquinadsa: –Ia Tonassiajade Diocca marinaja bica tani –quinahijine.

¹¹Jehe, Dio madijadsa huati cahanari canahi ahuatoinanajaro. Najarodsa madija huapima tocassiejerahijine pajirani. ¹²Dio iadsa huati cahanari canajaricca imapi ia mari canajaro, aji ibodicca imasiri inebonijine, ajijaro namicca ima tohuini inajaro inebonijine. Ajijaro namidsa imadidsa icca madie bica tanijine naqui ia mari canajaro. Ibodi huatomanissatadsa ima bicanira tocattejidsade icahattera, icca ima Diodsa pajiranissa tanijine icahattera, Dio Pohua tohuira dissera inanijine icahattera najaropaji. ¹³Jehe, Diocca tohuati huanehema imadidsapi Jesocristo ccnipomahicca huadatohui imadijaro. Aja icca Dio Bicabote ia Tonassiajade Jesocristo ccnipomadsapa pohua dsibehinema poccadeni tojehema ahuatotaha ccnipomahitohui. Najaro pajissa tojadsapi etidsenitohui. ¹⁴Jesopaitohui huati huana tadsa pohua ccacorajari. Tabaccorehe huapima inanaridsehe imadiporaha ia todinibaquihijine dsoqquejari. Pocca iquejenani ojari nanijine ia tonahirebaquijaripaja. Pocca iquejenaropi ima bicani tonanade disseraquiqui inanijine.

¹⁵Jehe Tito, aji ima huapima ojine dsodo onajarodsa mariticanabaquijo. Pina aji Dio Attissa inanamananijine tinahatidsebaquijo. Aji Dio Attissa inamanajeradsapi tetti dacorehema

huati ticanabaquijo. Pehuadenidsa: –Najaro imapi bica tejerani –tana. Madija tia ajimani inanamana-gerana. Nama quina-jarahijine ticappina-geradsa daco tijiraji.

**Jesodsa toquejenajaridenipa
ajama quinahijine**

3¹Ticca mamari tabaqqi bodideni huatoma-manahijine pehuadenidsa huati tinaji, aja tamine attidenidsa, dsama cacahuade attidenidsa naco iboraqquri nahijine. Poccadeni dsama cacahuadenicca marinajassa inanamananijine, ima bicanidsa dsepedeni ijimanahijine dosse dosse quinadsa naco: –Jehe, acco camade jipaqquri inani –quinahijine mari ticanabaquijo. ²Ticca mamari tabaqqi naco madijadsa tatamasso quina-jarana. Joneqquri nana, pina ahuaji huati ahuaji huati quina-jarahijine. Bicaqquri nadsa attideni bica tahijine. Bodidenipa: –Ohuapi deni ojajerani –quinadsa naco madija huapima accode iboraqquri nahijine, onajaro.

³Ia naqui tahidepi ponima imadiridsaccade. Diodsa ssamoqquri, iboqquri inaccade. Aji ia tohuini inanicca dodosse iquejenajarossa inaccade. –Jehe, ima nema najarona bica tani –ihinanaridsa naccade. Tabaccoraqquri inaccade. Itesse dsepetaji acconi huadiqquri ihinanaccade. Aji ia huapima naqui ahuaji jipera ahuaji jipera inaridsaccade. ⁴Naraha aja ia Tonassijade Dio Pehuana madija huapimadsa huati huanajide radsapa pocca biquehe, pocca tohuati huanehe dsama huapimacca madijadsa ahualo inanaridsajaropaji. ⁵Diopa

ia tonassijabaquijari. Naraha najaropi ia bica inanajarojine jerani, Diona itohui huati huana tajarijine. Ia tonassijabaquihijine Pehuana ibodi inahiredsa ibodi dsati tojadsapi Dio Corimejine madie dsati icajijaro. ⁶Diopa Puhua Bedi Jesocristodsa Puhua Corime da inadsa manaco Jesocristo ia Tonassijadena iadsa da inaridsajaripaja. Dio iadsa accora tadsa Puhua Corime namanaha iadsa inanaridsajaripaja. ⁷Dio nama najaripa iadsa huati cananari canajarijine. Iapi bicaqquri inejera-rahaha icca imasiri manaconi iadsa toja-geranijine ia todinibaquijari. Nadsama aji pocca camittehe jique-geranicca tohuini imadijaropi iadsa inanaoraropaji.

⁸Nadsama Tito, aji tiadsa ima dsodo onajaropi pajissa. Ajijaro imadsa Diodsa jehe quinarideni maride dissera tinaji, onajaro. Nahi ima bicanidsa dsepedeni ijridsamanadsa madija naco acco icamiridsabaqqi-manahijine. Najaro imapi bica tani. Najaro imadsana madija huapima tobicaridsamanahijine. ⁹Naraha ima ponimacca nebomanana. Ididenicca ima jadani naco huati nimanimanajarana. Najaro naqui ima ponimacca. Moisesicca marinajadsa jehe canire-jaradsa huadi huadi cacana najari naco nebomanana. Najaro ima ponimaccapi bica tejerani. Najarodsapa madija tobicamanajarahitohui.

¹⁰Ticca mamari tabaqqi ojariajine Jesocristodsa quequeriqquimana najarideni carobemanabote nadsapa pahuadsa huati tinaji, pocca ima nebohijine.

Mitta-jaradsapa pohuadsa huati timanipomaji. Naraha mitta-jaradsapa pohua tinebomanajo, tiadenidsa qquedsimapoma-jarahijine.

¹¹Madija namajide rahipa pohua atti tabaccora tanicca huatide nebo-jaradsapa nahatoqquiri tiquinani: bodi tabaccora tajari. Pahuapa imasiri inanajarojine pohua huahuattajo tojajaripaja.

**Tito pohua tedsejemacca
ima nahato tapohuijine
Pablo dsodo inajaro**

¹²Nadsama ohua naqui nidsa dsadsajadedsapi otesse Artema itide, otesse Tiquico itide tiahuaji dosse onahitohui. Nahi tiahuaji bacco tadsapa manaco tiapi odsapanani Nicoporihuaji ohua qquide ticcajonanijine dissera tinaji. Nidsa dsadsajadedsapi nanidsa omadinitohui. ¹³Nadsama aja ima cacattemade Sena, pohua tesse Apolo tedseje naco poccadani

benehidsa cappiramana-jarahijine acco ticamabaquijo, onajaro.

¹⁴ICca mamari tabaqqui naco ima bicani inanaridsamananijine tocahatterana, onajaro. Madija cappiramanadsa acco camade iboraqquiri nahijine tocahatterana. Nama quinadsapa pohuama madiridsamana-jarahijine. Ima bicanidsara dsepedeni ijimana-dsanapohuijine, onajaro.

**Pablopa huapimadsa
nija naridsajari,
–Diocca ima bicani
tiadenidsa tojana –najari**

¹⁵Nadsama Tito, aja madija huapima ohuadsa madimana-jaridenipa tiadsa nija quinajari. Aja timadinihuajicca itessedeni Jesodsa toquejenajari huapimadsa naco nija inajaro. Dio tiadeni huapimadsa ima bicani inanana, onajaro.

Epejeni. Ohua onipi Pablo.

Pabloa Piremaodsa ima teppe dosse inajaro

Filemón

Piremaopa Pablo pohua tesse Jesodsa jehe najari. Pohuapa Corosahuaji madijari. Pocca odsadsa naco Jesocristodsa jehe quinajarideni quequeri-quimana najari. Pohuapa dsepe sse tajari. Tarabajsajine medsedeni cajijari.

Piremaocca medse ojaría onipa Onesimo. Najaripa pohua medsedehuatirahi huaji tanihuaji joppa tajari. Odsa panani Romahuaji Pablosa bacco tadsapa Jeso tahimari mittadsa jehe najari. Nadsapa pocca ima icattemanijine –Ohua medsededsa occanina –najari.

Ajjaro ima teppe Pablo dsodo inajaropi Piremao pocca medse Onesimo inajidso-jarahijine. Pablo Onesimodsa huati huana tadsapa Piremaodsa dsodo inajaro, Piremaopa Onesimocca imadsa: –Epeje, ohuati ajimani –nahijine.

Pablo nija najari

¹ ¿Nija Piremao? Tiadsa occa ima dsodo onajaro. Ohuapi Pablo Jesocristo tahimari mari mari ohonanajarojine toponi cocorodsa ohuedsajaropaji. Jehe Piremao, imecote Timoteo tedseje tiadsa nija inajaro. Tiapi itesse bica tinade. Titohui eti huana tani. Jesocristo tahimari maride tia inadsa idsepe ijijarode. ² Ticca odsahuaji Dio Atti mittamanahijine totoqueriqqui najaridenidsa naqui nija inajaro. Aji imecote Apia ponidsa naqui nija inajaro. Imecote Ariquipo, Jesocristo tahimari maride ihicaberridsa najaridsa naqui nija inajaro. ³ Icça Abi Dio, ia Medsede Jesocristo tedseje tiadenidsa ima bicani

inanamanana. Poccadeni jonehe naqui tiadenidsa tojana, inajaro.

Pabloa Piremaotohui Diodsa huati huati tajari

⁴ Jehe Piremao, titohui Diodsa huati huati onadsapi: –Abi Dio, epejeni, tijine bica tani –ohonanajaro. ⁵ Nema onajaropi tijine ima bica tani quinahi omittajaro. Ia Medsede Jesodsa jehe tanissa tajaro. Diodsa toquejenajarideni huapimadsa teti huana tajaro. Najarojinea Diodsa ohuatidsejaro. ⁶ Ticca jeheniji pina icça jehenijissa najaro. Jesocristo iadsa huati huana tajarijine iadsa ima bicani inanajaro. Najaro pocca daniji huapima timittanissa taniijine Diodsa huati huati odsanapojaro.